

præter eam ibi designetur Metropolis hisce in provinciis, inter avulsas à Romano Patriarchatu, nullam etiam apud eas tunc fuisse pro certo habendum videtur. Aliæ si fuissent, has item procul dubio sedi Constantinopolitanæ subjecissent Græci Imperatores, sicut subjecerunt Hydruntum, & sanctam Severinam, postquam ad honorem Metropoleon evectæ fuerunt ab hujus urbis Patriarcha, cum parem in eas haberent authoritatem, ac in Rhegium, hisque provinciis omnibus imperarent. Nec est tamen quod censeas istas, hoc est, S. Severinam & Hydruntum, quæ in Diatyposi Constantinopolitana apud Leunclavium leguntur, ante Iconomachos Metropoles fuisse, cum inter avulsas à Romano Patriarchatu haud recenscantur. Ideo enim illas, sicut & plures alias quæ in eadem Notitia vulgò Leoni Philosopho tributa reperiuntur, honore isto posterioribus tantum sæculis insignitas fuisse à Græcis Imperatoribus, existimandum est. Dixi vulgò Leoni tributa, quia revera per Leonem eo modo edita non est, quo apud Leunclavium legitur: idque satis ex hoc patet, quod plures civitates nonnisi post illum Imperatorem Metropoles factæ fuerint, ut sola lectione dignoscitur, quæ tamen apud eam antiquis annumerantur, licet nullatenus hoc cum nomine legantur in alia manuscripta Bibliothecæ Regiæ longè antiquiori, & quam, ut verisimilius sub Leone factam, ad calcem hujus operis dabimus.

De Capua forsitan dubitatio erit, cum æmula quondam fuerit Romæ, teste ^a Cicerone, Metropolisque dicatur totius Campaniæ ab ^b Athanasio. At licet non repugnem, quin inter celebriores Italiæ Metropoles Civiles recensatur; (idque tantum voluit Athanasius, qui etiam Coloniam Agrippinam Metropolim superioris Galliæ vocat, licet Archiepiscopalis non fuerit, nisi sub Bonifacio Germaniæ Apostolo) tamen quod hujusce Notitiæ temporibus, hoc est, ante finem sexti sæculi, Metropolis Ecclesiastica non fuerit, clarè videtur apud Leonem ^c Ostiensem, qui eam honore isto à Joanne decimotertio donatam fuisse scribit circa annum nongentesimum septuagesimum primum, dum ait: *Hujus Abbatis nono decimo anno, Joannes Papa de Roma exiliatus, venit Capuam, & rogatus à præfato Principe Pandulfo, tunc primum in eadem civitate Archiepiscopatum constituit: consecrato ibi Joanne fratre ejusdem Principis Archiepiscopo. Post quem Dominus Leo hujus cænobii Monachus in eadem civitate, quatuor annis & dimidio Archiepiscopatu functus.* Subdit illustrissimæ memoriæ Cardinalis Baronius civitatem illam ante omnes alias regni Neapolitani Metropolim factam fuisse, idque se in monumentis Ecclesiarum hujusce regionis observasse asserit. Hanc autem conjecturam adeo probabilem confirmabo ex perantiqua Notitia Metropoleon Italiæ in vetusto Codice Thuano, quo hæc quinque Metropoles tantum recensentur.

*In provincia Etruria, sive Tyrrea, numerantur civitates
Civitas Romensium Metropolis.*

*In provincia Capuensi
Civitas Capuensis Metropolis invenitur.*

*In provincia Flaminienti, civitates numerantur
Civitas Ravennensium Metropolis.*

*In provincia Venetiensi & Histriensi numerantur
Civitas Aquileiensium, ipsa est Forum Julii.*

*In provincia seu Liguriensi, civitates numerantur viginti.
Civitas Mediolanensium Metropolis.*

Hæc habet Notitia antiqua, ex quibus patet evidenter, Capuam primam Metropolim in continenti Italiæ factam fuisse post Romam, Mediolanum, Ravennam & Aquileiam. Obstare tamen videtur Notitia alia antiqua Bibliothecæ Regiæ temporibus Photii Patriarchæ Constantinopolitani facta, dum ait Rhegitanam Metropolim jam tunc avulsam fuisse à Patriarchatu Romano. Is enim vixit seditque Constantinopoli, dum in ea celebrata est Synodus octava

^a Cic. Orat. i. contra Rullum.
^b Athan. Epist. ad Solitar. Bv.
μέντιον μὲν τὸν
ἀπὸ Καπύης, ἔστι
δὲ αὕτη μητρόπο-
λις τῆς Καμπαν-
ίας, Εὐφράτην
δὲ τὸν ἀπ' Ἀγριπ-
πίνης, ἔστι δὲ καὶ
αὕτη μητρόπολις
τῆς ἀνω Γαλλίας.
^c Leo Ostien.
l. 2. c. 9.